



Rinfrestgar la vaccinaziun cun in vaccin mRNA (Pfizer/BioNTech, Moderna)

Ils vaccins mRNA protegian fitg bain cunter grevs decurs da COVID-19 cun ospitalisaziuns. Tar las personas sur 65 onns sa mussi dentant che questa protecciun da la vaccinaziun po sa reducir cun il temp. A questas personas recumandain nus da laschar rinfrestgar la vaccinaziun a partir da 4 mais suenter l'ultima vaccinaziun. Fin ussa n'èsi anc betg cler, sche la protecciun da la vaccinaziun cunter grevs decurs sa reducescha tar personas sut 65 onns e tar novas variantas dal virus. La protecciun cunter in decurs miaivel da la malsogna sco er cunter ina transmissiun dal virus sa reducescha per cunter cun il temp tar tut las personas. Tut tenor la varianta dal virus po quai succeder pli u main svelt. Perquai recumandain nus er a tut las personas da 16 fin 64 onns da laschar rinfrestgar la vaccinaziun.

Pertge duess ins laschar rinfrestgar la vaccinaziun?

Cun rinfrestgar la vaccinaziun duai il sistem d'immunitad vegnir regurdà al virus. Ina protecciun pli gronda da la vaccinaziun vegn garantida e prolungada.

A tgi vegni recumandà da laschar rinfrestgar la vaccinaziun?

Per ina protecciun optimala cunter in grev decurs da COVID-19 cun ospitalisaziuns vegni recumandà a tut las personas sur 65 onns da laschar rinfrestgar la vaccinaziun. En spezial a:

- personas sur 75 onns;
- personas sur 65 onns cun malsognas cronicas cun la ristga maximala¹ per in grev decurs da COVID-19;
- abitantas ed abitants sco er personas assistidas en chasas da personas attempadas, en chasas da tgira sco er en instituziuns per la tgira da personas attempadas durant il di.

Tar personas sut 65 onns po la vaccinaziun da rinfrestgament gidar ad augmentar la protecciun cunter infecziuns e decurs miaivels da la malsogna e cunter lur consequenzas (p.ex. COVID-19 a lunga durada, assenza a la plazza da lavur) sco er a reducir temporarmain la circulaziun dal virus. Perquai vegni recumandà er a tut las personas da 16 fin 64 onns da laschar rinfrestgar la vaccinaziun. En spezial a:

- personas spezialmain periclitadas sut 65 onns cun malsognas cronicas cun la ristga maximala¹ per in grev decurs da COVID-19;
- abitantas ed abitants sco er personas assistidas sut 65 onns en chasas da personas attempadas, en chasas da tgira sco er en instituziuns per la tgira da personas attempadas durant il di;
- persunal da sanadad che ha contact direct cun pazientas e pazients sco er persunal da tgira da personas spezialmain periclitadas.

La vaccinaziun da rinfrestgament vegn recumandada er a dunnas en speranza a partir dal 2. terz da la gravidanza ed a mammas che tezzan.

Cura duai vegnir rinfrestgada la vaccinaziun?

I vegn recumandà da laschar rinfrestgar la vaccinaziun a partir da 4 mais suenter che l'immunisaziun da basa cun in vaccin mRNA è terminada. L'immunisaziun da basa è terminada suenter

- duas dosas d'in vaccin mRNA;
- ina infecziun confermada cun il coronavirus + ina dosa d'in vaccin mRNA en in interval d'almain 4 emnas (independentamain da la successiun).

¹ Tabella 2, p. 11 da la recumandaziun da vaccinaziun per vaccins mRNA: *Definiziuns da las malsognas per personas cun malsognas cronicas cun la ristga maximala*

Sch'ina infecziun cun il coronavirus vegn confermada, suenter che l'immunisaziun da basa cun in vaccin mRNA era terminada, vala il suandant:

- Sche Vus As infectais entaifer 4 mais suenter l'immunisaziun da basa, vegni recumandà da laschar rinfrestgar la vaccinaziun 4 mais suenter questa infecziun.
- Sche Vus As infectais dapli che 4 mais suenter l'immunisaziun da basa, na stuais Vus actualmain per regla betg rinfrestgar la vaccinaziun.

Cun tge vaccin e cun tge dosa vegn la vaccinaziun rinfrestgada?

Per rinfrestgar la vaccinaziun duai da princip vegnir duvrà il medem vaccin sco per l'immunisaziun da basa. Sche quel n'è betg disponibel, poi er vegnir applitgà mintgamai l'auter vaccin mRNA. Sch'i èn vegnids duvrads differents vaccins mRNA per l'immunisaziun da basa, po la vaccinaziun vegnir rinfrestgada cun in dals dus vaccins.

Sco tar l'immunisaziun da basa vegni recumandà a las personas sut 30 onns da laschar rinfrestgar la vaccinaziun da preferenza cun il vaccin da Pfizer/BioNTech.

Per rinfrestgar la vaccinaziun cun il vaccin da Pfizer/BioNTech vegn duvrada la medema dosa sco per l'immunisaziun da basa. Per rinfrestgar la vaccinaziun cun il vaccin da Moderna vegn duvrada ina mesa dosa.

Nua poss jau ma laschar vaccinar?

La Confederaziun ha elavurà ina strategia da vaccinaziun e recumandaziuns da vaccinaziun. Responsabels per las vaccinaziuns èn ils chantuns. As infurmai sin la pagina d'internet u tar l'Infoline da Voss chantun (www.bag-coronavirus.ch/kantone), nua che Vus pudais As laschar vaccinar. U dumandai Vossa media, Voss medi, Vossa apotecra u Voss apotecher.

Las ulteriuras infurmaziuns valan tant per l'immunisaziun da basa sco er per laschar rinfrestgar la vaccinaziun e pon vegnir consultadas sin il fegl d'infurmaziun «*Infurmaziuns generalas davart la vaccinaziun cunter COVID-19 cun in vaccin mRNA*».

